

清史列傳

清史列傳 卷四十三

大臣傳續編八

江忠源

江忠源湖南新寧人道光十七年舉人二十四年大挑二等以教職用二十七年新寧會匪雷再浩等滋事忠源率鄉兵搗其巢擒雷再浩事平以知縣用賞戴藍翎二十八年揀發浙江二十九年署秀水縣知縣三十年補麗水縣知縣是年文宗顯皇帝登極詔中外大臣各舉所知禮部右侍郎曾國藩疏薦忠源遵旨赴部引見並蒙召對旋丁父憂咸豐元年粵匪洪秀全等倡亂上命大學士賽尚阿爲欽差大臣督師往剿奏調忠源赴營差委忠源募鄉兵五百率赴廣西時賊氛甚惡官兵莫敢攖其鋒忠源築壘逼賊營賊以其兵少且新集急犯之忠源堅壁如不敢戰賊近塹始開壁馳之斬首數百賊大敗以功賞換花翎俟服闋後以同知直隸州知州用尋賊聚於永安州官兵環攻不克忠源與副都統烏蘭泰議掘長壕聚殲之統兵者不能用遂以疾歸二年正月賊犯廣西省城忠源由新寧增募

千人倍道赴援至則烏蘭泰已中礮卒城圍逾月乃與總兵秦定三等由飛龍橋進攻古牛山設伏誘戰敗之復自北門外移營東面連擊之並於貓耳山分路設伏三面兜圍殲戮及追溺者甚衆賊旋由棲霞寺一帶來撲忠源等伏礮擊卻之賊夜遁省城圍解論功以知府用四月賊竄全州附城屯踞忠源偕官軍追及疊遏其衝並建議扼要布營杜賊歧出賊擄船圖竄忠源豫於河面密釘排樁阻截仍分路逼攻賊營賊拒戰兇猛忠源策馬當先兵勇繼進大敗之越日賊穿地道破城入旋竄出將循河北駛忠源等繞前迎截翼日賊船二百餘聚泊蓑衣渡我軍四路力攻賊酋馮雲山中礮死賊乘夜棄舟逸忠源以全州東岸空虛請分軍扼截復請躬率所部往均未及用其策賊尋由東岸竄湖南陷道州五月忠源偕各軍分隊併進誘賊出巢敗之賊築壘樹柵意圖久踞我軍逼攻賊堅匿不出六月忠源購城賊爲內應約期合攻賊夜遁由藍山嘉禾犯桂陽陷郴州我軍拔營追之七月連次進攻忠源設伏接應賊潰復分股竄逼長沙省城忠源自郴州赴援賊大股亦由郴州併趨省城南門外天心閣地勢最高賊爭柵其上忠源望見驚曰賊據此長沙危矣急率所部縋城爭之我軍死傷數十人忠源督戰益力賊

不支始退出忠源移壘逼賊去賊營僅數十步共汲一井擊柝聲相聞自八月至九月與賊相持賊日蹙十月長沙圍解忠源以官軍四面集惟河西一面虛請調重兵駐迴龍塘扼賊竄路期盡殲之會賽尙阿罷斥欽差大臣署湖廣總督徐廣縉久不至無所從賊遂由迴龍塘竄出掠舟西遁十一月追賊至臨資口會巴陵土匪晏仲武等乘亂肆擾忠源奉檄剿平之十二月移師剿瀏陽會匪周國虞賊勢張甚忠源設伏掩殺賊大敗追奔二十里斬首七百解散脅從萬餘瀏陽平三年正月以上年防守湖南省城功命以道員用時粵匪由湖南竄湖北陷武昌省城署湖廣總督張亮基奏調忠源赴湖北差委尋擢湖北按察使粵匪復自武昌沿江下竄由安徽犯江蘇欽差大臣湖北提督向榮跟蹤追剿二月上以忠源歷次接仗奮勇命帶親信兵赴向榮軍營張亮基奏留忠源暫緩前往允之賊尋陷江蘇江寧府鎮江揚州亦相繼失守詔忠源迅赴江南幫辦向榮軍務適湖北通城縣土匪劉立簡糾衆肆掠張亮基檄忠源剿平之並剿滅崇陽土匪陳百斗嘉魚土匪熊開宇等亮基奏入得旨江忠源見剿湖北匪徒著暫緩起程卽趕緊將著名首逆悉數殲擒時通城土匪陳申子等由桂口徑襲崇陽忠源率其弟六品

頂帶忠濟等馳抵桂口斬陳申子於陣乘勝攻剿何葛垵匪首何田俊復敗之擒著名逆匪二十餘人四月以剿辦土匪將竣遵旨前赴江南並以軍輿數載巨寇披猖貽誤有由宜思變計將軍務得失臚舉八條陳奏一曰嚴軍法將不行法是謂無將兵不用法是謂無兵全州以失援陷而赴救不力者相仍道州以棄城陷而望風先逃者接踵馴至岳州豫設防師不能爲旦夕之守九江厚集兵力不能遏水陸之衝由畏賊念重畏法念輕也夫賊常致死於我而我轉避其鋒利鈍之機已決於此粵匪於官軍接仗每驅新附之賊在前以死黨監督其後卻顧者輒殺之故不得不爲之盡力誠欲易怯而爲強莫如易寬而用猛一曰撤提鎮承平日久提鎮類多積資較俸洊至高位未必均有膽略也而軍營體制副參以下俱聽命於提鎮提鎮不得其人則一軍皆難得力又軍興既久籌餉維艱裁一提鎮之費養精兵二百有餘副參以下敢戰者未嘗無人資位較輕則奉檄不敢遷延拔擢方始則臨事易爲感奮誠擇提鎮之久歷戎行膽氣尙優者以資統御其餘概行裁汰庶軍政嚴而軍餉亦裕矣一曰汰弁兵選兵之道膽氣第一樸實耐苦次之技藝嫺熟又次之巧滑怯懦最下有武藝而無膽氣則臨陣忙亂戰陣之事

與搏鬪異旌旗駭目金鼓震耳膽怯則心易動心動則耳目手足舉失其常樸實耐苦之人軍令易於服習令進則進令退則退故可得而用巧滑怯懦之流無事則應對趨踰臨陣則趑趄退避論功則多方鑽營遇敗則巧爲推諉此弁兵之宜汰者也一曰明賞罰軍興以來得一勝仗先邀獎錄者皆主帥左右隨侍之人而逆匪蔓延四年未嘗行一失律之誅何以昭懲勸乎夫賞罰未可一概論也勝固當賞然或雜然並進割取他人之首級以冒功或當追擊至要之時不思乘勝掩殺祇顧奪取財物以致大勝變爲小挫則又當罰敗固當罰然或奮勇前驅後軍不繼或大衆皆走一軍獨前則又當賞若大帥惟據營主之稟報營主又付諸左右之品評功罪之實旣非采訪所能知好惡之心又因毀譽而多誤求有當於人心難矣自非親歷行陣開誠布公何以振積疲之習乎一曰戒浪戰我兵併力攻賊堅壘每至損傷精銳其新兵未與賊戰者不諳營壘壕牆之式將卒無所恃以爲固往往爲賊所乘賊分數路來撲我每以一路當之卽或數道併登而臨陣彼此不相顧或左進而右退或後卻而前行賊得以施其奇正鈔伏之術皆危道也故賊之止也宜扼要以斷其接濟嚴兵以堵其逃竄賊之行也宜豫擇精兵宿將

迎頭攔截以遏其鋒沿途設法以撓其勢乃我之圍賊也不務扼要嚴防專以撲營逐利爲事其追賊也不務攔頭逆擊專以跟蹤尾擊爲能小有失挫將卒之氣先餒須養之經旬始堪再戰使賊得以長其兇鋒此浪戰之宜戒也一曰察地勢地利非僅山谿之險也視賊出入之蹤而先爲之防察賊分合之勢而遙爲之制雖漸車之澮數仞之岡苟形勢在所必爭則機會不可偶失請以近事明之全州蓑衣渡之戰賊鋒已挫宜連營河東斷賊右臂道州之役賊勢本孤宜分屯七里橋扼賊東竄長沙之圍賊路俱窮宜據迴龍塘土牆頭堵賊西潰之路他如道州雙牌蓮濤灣六十里之奇險賊入死地而縱之使生湘陰之臨資口岳州之城陵磯皆水陸必爭之隘而放之使遁皆由事前未及虛心體訪豫爲綢繆故也一曰嚴約束兵丁舊明營規果能嚴爲約束無難一律肅然鄉勇多係四方無籍之民較兵丁殊爲難馭然猶可按兵籍而稽至於長夫及隨營買賣之人倏來倏往蹤跡靡常或假充兵勇掠取近營村莊財物轉賣營中將來事竣散處民間必爲後患從前三省教匪大局已經戡定而勇夫嘯聚又兩年始平其明證矣一曰寬脅從兇惡痞棍楚粵州縣所在有之平日作奸犯科官司每苦文法之繁曲從寬宥

一旦有警從亂如歸又所配流軍及被賊劫放監禁此皆甘心從賊寬之無可寬者也至於驅脅之徒並非甘心從賊宜多寫簡明示諭射入賊中臨陣旁豎投誠免殺大旗令其乘與賊接仗之時棄城奔赴給免死執照資遣回家庶幾黨與既披渠魁自殄疏入得旨所陳均切中機宜該臬司親歷行間兩載以來目擊軍情自非空談輶鈴者比見已赴江南軍營著卽將各條與向榮等悉心商權認真辦理會湖北廣濟土匪宋關祐等抗糧爲亂上命忠源順道迅速剿辦忠源督兵進剿斬首五百餘俘數十人解散被脅愚民甚衆五月行抵九江會粵匪由江寧分股溯江上竄撲江西省城忠源方奉命援鳳潁聞警卽疏請改道先援江西率親兵千三百人三晝夜行五百里抵南昌卽偕巡撫張芾等力籌戰守賊方環攻各門施槍礮挖地道忠源宿譙樓曉夜躬巡督兵勇加築月城開挖深壕安設甕聽卽突門出戰賊屢撲屢退往復者四復密派兵勇縋城焚賊巢節次斬擒無算上以忠源屢著戰功所帶楚勇尤奮往出力詔嘉獎之六月忠源飭兵勇分三路迎剿燔章江門外賊壘及船賊穴地轟城陷數十丈衆數千蠡擁上忠源率其弟忠濟督楚勇首先奮擊搶護城缺鑿戰經時賊死傷山積奏入上嘉之賜白玉翎管

四喜搬指各一尋湖南援師亦先後集賊氣沮圖竄吉安臨江會安福泰和萬安各屬土匪紛起忠源恐土匪與南昌之賊鈎連則上下路絕乃分軍樟樹鎮扼賊衝而檄訓導羅澤南剿泰和各匪平之八月忠源於章江得勝兩門城上分置巨礮十餘逼對賊壘晝夜轟擊壘盡傾並沈賊船賊將遁忠源令兵勇乘勢下城縱火值南風大作火益猛賊驚潰痛殲之賊軍械多燬紛紛登舟揚帆下竄遂解南昌之圍疏入諭曰逆匪攻撲江西省城九十餘日經江忠源等督率官紳兵民協力固守雖未能剿盡賊匪而城圍已解自應先沛恩施江忠源著賞給二品頂帶尋賊自南昌回踞九江忠源追剿賊復分股溯江上竄擾湖北興國州徑撲田家鎮初武昌道徐豐玉漢黃德道張汝瀛駐守田鎮用戰艦扼江而南岸半壁山不設備忠源督軍追至急揮兵據險賊船揚帆直上已先我兵而登陸路賊亦麇至水陸交訌官軍遂潰徐豐玉張汝瀛死之時忠源至田鎮甫一日自請嚴議上念其初到救援不及降四級留任旋擢安徽巡撫賊自田鎮連檣上駛擾黃州攻陷漢陽漢口圍撲武昌省城忠源收集兵勇往援以江路梗阻疏陳留楚剿辦情形擬先攻復漢陽十月進抵潯口賊懼忠源躡其後乘夜遁忠源卽分兵沿江追剿

擊沈賊船殪賊無算武昌解嚴遂繞道赴任並疏請增兵萬人當一路先是安徽自安慶府被陷移省會於廬州府至是江西之賊下竄再據安慶江寧之賊又分股竄擾逼近廬州忠源以廬州爲南北樞紐赴援稍遲賊且北竄遂以二千人先發行抵六安州適舒城桐城已陷士民遮道請留忠源方病入城爲繕守備六安人心稍定而廬州警報日夕至乃留千人守六安自率數百人馳抵廬州未幾賊大至團丁潰散忠源力疾登陴誓死守城周二十六里合團丁及援兵僅三千人糗糧軍火一無所有賊挖地道我軍迎掘破其詭計賊疊次撲城均擊敗之殪賊數百獲雲梯五十餘具奏入上以忠源病軀督戰疊挫賊鋒優詔嘉其忠勇賊旋以地雷轟大西門月城缺十餘丈衆擁上忠源力禦卻之隨督兵勇搶築城復完忠源疏陳固守待援及餉需不繼情形十一月湖北之賊竄入安徽英山縣忠源以未能先事豫防下部議處時廬州賊日夜環攻因官軍防禦甚力復暗掘地道我軍穴牆出城擊退賊復於水西門伏地雷我軍再迎掘之賊計窮越日賊四五千入撲小東門忠源以城外援兵稍集楚勇縋城接應忽水西門月牆被地雷轟裂八丈有奇火光猛烈城搖撼賊乘勢欲徑入忠源親督兵勇冒煙衝上施槍

礮擲火彈燬百餘人賊不敢上並分兵殲小東門之賊多人遂乘勢鈔擊賊敗卻
奏入得旨江忠源力保危城躬親戰陣督率將弁兵勇併力捍禦俾得化險爲平
實屬忠勇可嘉之至著賞給霍隆武巴圖魯名號廬州自十一月合圍忠源堅守
逾月賊奪氣將遁矣有內奸以城中食乏軍火且盡告遂增掘隧道十二月賊併
力攻城水西門城塌十餘丈忠源且戰且修築賊突自南門緣梯入人聲鼎沸忠
源知事不可爲掣佩刀自刎左右持之一僕負忠源行忠源嚼僕肩及耳血淋漓
僕創甚不得已委忠源於地賊逼忠源轉戰至水關橋之古塘身被七創奮投橋
下死之布政使劉裕鈐池州府知府陳源堯同知鄒漢勳胡子雖縣丞興福艾延
輝副將松安參將馬良勳戴文瀾均同時殉難忠源歿後八日舊部周昌發冒死
入城負尸出面如生事聞諭曰江忠源以知縣調赴軍營屢立戰功超擢臬司令
其幫辦軍務本年在江西守城尤爲出力倍著功勤旋即授爲安徽巡撫由湖北
力疾赴皖甫抵廬州卽值逆匪圍攻郡城督率文武紳民兵勇竭力守護一月有
餘屢次出奇制勝力捍危城方資倚畀乃因援兵不力以致賊陷廬州捐軀盡節
深堪悼惜江忠源著追贈總督卽照總督陣亡例賜卹入祀昭忠祠任內一切處

分悉予開復應得卹典該衙門察例具奏並著於殉難地方建立專祠以慰忠魂
四年復諭曰江忠源因廬州被陷臨陣捐軀當經降旨優卹後將伊弟江忠濟江
忠濬先後加恩以知府知州用念江忠源身經百戰力守危城厥功甚偉以外援
不力效命行陣每憶孤忠時深矜憫其靈柩回籍時著福濟和春派委妥員護送
出境並著沿途地方各官妥爲照料用示朕垂念盡臣至意尋賜卹如例予諡忠
烈賞騎都尉兼一雲騎尉世職九年湖南巡撫駱秉章奏請於湖南省城建立忠
源專祠詔如所請同治元年上追念死節諸臣以忠源及其弟忠濟先後歿於行
陣一門忠烈尤堪憫惻各賜祭一壇三年上以江寧克復念忠源戰功賞三等輕
車都尉世職七年江西巡撫劉坤一奏江西士民感戴忠源力守省城呈請捐資
爲忠源及其弟署廣西提督江忠義建立專祠允之光緒三年前兵部左侍郎彭
玉麟奏陳忠源前在湖北按察使任內戰功政績允洽人心請入祀湖北省城羅
澤南等三忠祠允之子孝棠襲世職

李續賓

李續賓湖南湘鄉人廩貢生咸豐二年粵匪洪秀全等竄擾湖南長沙同郡貢生

羅澤南創辦團練續賓以父登勝命往應之續賓能以兵法約束團勇所練悉精銳三年賊圍江西省城前禮部右侍郎曾國藩湖南巡撫駱秉章檄續賓隨羅澤南赴援會土匪圍吉安府陷泰和安福二縣續賓隨同解吉安之圍克復泰和安福事平以從九品用未幾土匪陷永興縣續賓復隨同往剿戰於油榨墟復其城尋復敗湘潭之賊敘功以縣丞用先是續賓所部僅三百六十人至是駱秉章檄增爲五百人駐軍衡州平常寧土匪四年七月曾國藩統水陸軍東下續賓隨澤南及提督塔齊布等赴剿抵岳州駐大橋時湘軍纔千人分防八路賊日夜來犯續賓鏖戰連旬破賊壘數十岳州平遂追賊至臨湘縣之長安驛湖北蒲圻之羊樓崗崇陽之虎爪石柱口克復崇陽咸寧縣城又擊賊於橫溝礮官步礮敗之敘功擢知縣賞戴藍翎八月進剿武昌壘破花園及鮎魚套賊壘遂復武昌漢陽語均在羅澤南傳曾國藩奏續賓自岳州拔營東下常爲軍鋒沿途七戰皆捷攻克花園堅壘尤足制賊之命得旨以直隸州知州用賞換花翎九月隨同克復興國州擒僞進士胡萬智斬之十月進攻半壁山賊巢隨羅澤南紮營山下距提督塔齊布之營十餘里中隔小河塔齊布正督兵搭造浮橋以通兩營之路忽突出多

匪阻遏渡處沿江賊船及由田家鎮渡江之賊各出數千分扼半壁山左右其占踞舊壘之二萬餘復空壁來撲時塔齊布之師無橋可渡澤南所統鄉勇又衆寡不敵軍士多失色逃者三人續賓怒馬入陣手斬三人以徇麾軍血戰賊大潰殲賊萬計斷賊橫江鐵鎖遂破田家鎮捷入記名以知府用賞摯勇巴圖魯名號十一月授安徽安慶府知府時賊以黃梅爲湖北安徽江西三省總匯之區悉衆踞守勢張甚湖廣總督楊需方駐軍北岸不敢前續賓乃隨塔齊布羅澤南渡江北剿力攻堅城身先士卒克復黃梅及廣濟縣賊復糾安慶竄賊踞孔壠驛小池口一帶續賓等由對岸督兵進攻遇賊於濯港痛殲之尋剿湖口援賊至梅家洲大小十餘戰皆捷十二月水師陷入彭蠡湖外江失利小池口賊勢復張湘軍退回九江續賓憤甚自率千餘人渡江攻小池口僞城因衆寡不敵戰不克五年二月武昌復陷適江西之饒州廣信告急曾國藩督兵至江西檄續賓等往援三月偕羅澤南赴剿連復弋陽興安德興浮梁各城會義寧州陷七月進攻義寧拔其城語均詳羅澤南傳得旨記名以道員用八月隨羅澤南回援武漢克復通城縣會崇陽復陷九月督兵移剿克之賊旋竄蒲圻之羊樓崗爲負隅計賊酋石達開率

衆大至續賓督隊迎擊斃賊九百餘生擒七十餘十月石達開等復合悍賊六萬餘人自蒲圻來撲續賓等又敗之追殺十餘里殲擒賊二千餘遂復蒲圻捷聞加鹽運使銜並賞續賓父母三品封典時賊自蒲圻敗竄後復約興國大冶之賊麇聚咸寧縣續賓攻克之遂同羅澤南會合湖北巡撫胡林翼之師進規武昌省城駐軍洪山十二月破塘角賊壘旋與知縣劉騰鴻扼賊窰灣斬馘數千屢戰皆捷六年二月寧紹台道羅澤南以乘勝攻城中礮卒所部皆精銳胡林翼奏請以續賓統其軍三月進攻省城平壕道六埭平保安門中和門賊壘三並毀長虹橋西一帶濠壘四月賊乘我兵分援江西屢出城來犯續賓敗之於賽湖隄又敗之於小龜山雙鳳山七月石達開由金陵會湖口臨江各路賊七八萬人上犯分十三股並進城賊將應之續賓分兵由魯家巷進剿旬日之內大小二十八戰解散脅從萬餘人燬援賊營壘二十八座八月賞布政使銜時城賊堅閉不敢出續賓遂增勇開壕掘江水入湖爲長圍斷賊接濟賊益困十一月克復武昌省城得旨記名以按察使用武昌旣復卽分三路追剿賊由魯家巷繞出葛店續賓以馬隊迎擊殺賊千餘追至樊口賊爭先渡水斷浮橋以遏我軍復糾武昌縣之賊意圖抗

拒續賓督各營造橋進攻由西門殺入武昌縣城亦復卽渡江進取黃州於江邊設伏賊突出二千餘撲我水師遇伏盡潰我軍乘勝薄城克之並下興國大冶蘄州瑞昌各城遂帥師直搗九江悍酋林啟榮率衆死守七年正月濬長濠三十餘里以困之二月賊出毀濠疊經我軍擊敗先後擊賊於八里波西壩並下八里波敗湖口援賊於茶菴安慶援賊於新壩三月長濠成四月皖賊犯蘄州及黃梅羅田續賓分兵攻陸家嘴進援蘄州皆大勝五月城中悍賊突出踰濠又擊敗之六月賊傾巢上犯蘄黃告急續賓督軍渡江大戰於廣濟之童司牌破賊壘十九座八月會水師攻破小池口僞城仍回攻九江續賓以九江賊恃湖口相掎角不拔湖口九江不可得也乃定計水陸夾攻湖口九月續賓遣弟知府續宜率馬步軍攻梅家洲僞城而自率師揚言剿宿松迂道八里江伏湖口後山士卒皆捫蘿上時提督彭玉麟以舟師攻湖口東遊擊黃翼升以舟師攻梅家洲提督楊岳斌夾擊石鍾山賊方悉銳抗拒續賓率師從山椒破空下賊大驚遂盡殲其衆湖口縣城立復梅家洲賊亦棄城遁乘勝復彭澤縣平小姑汊僞城捷聞授浙江布政使十二月剿平臨江逸賊八年二月會水陸各軍攻九江添募勁旅空濠合圍水師

十餘營駐守北面江岸賊援遂絕四月分三道開挖地道督飭水師各軍分攻北門及東南一帶東南隅地雷暴發轟塌城垣百餘丈我軍梯而登殄賊萬六七千遂復堅城擒林啟榮及僞元戎李興隆等磔之捷入加巡撫銜賞穿黃馬褂會賊酋陳玉成自安慶陷麻城黃安續賓移兵進攻五月克之七月奉命征安徽時賊據廬州欽差大臣勝保及巡撫翁同書之師在北續賓定計南北合剿互爲聲援遂率師由太湖前往自八月至九月攻破楓香鋪小池驛梅心驛及桐城舒城城外各賊壘先後克復太湖潛山桐城舒城各縣城聲威大振乘勝進剿廬州先是賊於廬州府屬之三河鎮築僞城一輒壘九憑河設險負嵎久其地爲水陸之衝扼廬州要害屯聚米糧軍火以接濟廬州及金陵賊營我軍非先得三河不能進兵廬州也而是時兵勇一分於九江湖口彭澤再分於蘄州黃州又分於桐城舒城續賓所統僅五千人九月駐軍三河規度形勢以攻城必先破壘遂以一軍攻河南大街及老鼠夾一帶賊壘一軍攻東北面迎水菴水晶菴一帶賊壘一軍攻西面儲家越賊壘親督馬隊爲各路策應十月初二日整隊出擊賊以大股迎拒我軍分途進斃衝鋒悍賊百餘賊勢稍卻狂奔入壘死拒礮石雨下我軍鼓勇而